



Selasa, 20 September 2022
Ogen: Matius 18: 21-22



7 Kali 70 Kali



Agama lit gelah geluh manusia sikap ras mehuli. La lit agama apai pe si ngajarken kerna kejahatan, erbahan jahat nta pe erbalas nandangi kejahatan alu kejahatan. Agama Kristen terutama ngajarken kerna mereken pembebasen man kalak sideban, perdamen ras usahanta guna njagai si mehuli e gelah tetap terjaga. Emaka i bas padan si ndekah lit iarusken gelah bangsa Israel erbahan tahun Yobel. Tahun Yobel enda eme masa 7 kali 7 tahun, ia i bas tahun pe-50-ken arus maka utang senina nta pe teman sada bangsa iulihkan man bana. Ertina si lit utangna pe maka kerina borohna iulihkan ianggap maka utangna e nggo sai, amin gia langa bali. Em peraturen si ibahan Tuhan gelah enggo terbiasa bangsaNa la menuntut nandangi teman tapi bergantung ku bas Tuhan guna mpekena-kena ia. Jadi asum Petrus nungkun man Tuhan Yesus pe kerna ngalemi teman, ipakena prinsip tahun Yobel, 7 kali 7 maka lewat asa si e, arus maka si bali-bali utangna arus igalarna sue ras bilangenna. Mata ganti mata, tan ganti tan. Tapi Tuhan Yesus ngajarken si deban. Labo bias 7 kali 7, tapi 7 kali 70 kali. Enda sada bilangan si la terjeng asa jumlahna saja ngenca. Tapi lit i je pengertin maka la lit sibarna kerna ngalemi teman. I bas kesejajaren teks enda i bas Lukas 17:3-4, iterangkan maka kesalahen e amin gia lalap ilakokenna arus si alemi. Ngalemi erkawiten ngelupaken ras ngaloken. Ngelupaken perbahanen kalak si la ngena ateta ras ngaloken maka kalak si erbahan salah e enggo erbahan salah. Sialoken ia i bas kekurangenna si erbahanca kita merugi, erceda ate ras kitik ukur. Ngalemi 7 kali 70 kali, ngatakenca kininggitenta ngalemi la ersibar, sura-suranta erbalas la lit janah perkuah ateta tetap maler. Si e silakoken erkiteken Tuhan si nuruh kita, ialemiNa kita arah dosanta, IA saber ras mekuah atena man banta. Emaka nggit kita ngalemi salah kalak man banta.